

■ COLUMNA

La pasch cun sasez

DA MARIA CADRUVI

Questa giada ha il telefon cun K. ma fatg vegnir pensiva. Nus ans telefonain trais u quatter giadas l'onn, ina giada per ordinari tranter Bumaun e Bavania. K. è single ed abitescha en l'exteriur. Malgrà ch'el viva en relaziuns finanzialas modestas è el fitg generus cun ils auters e na spargna betg cun regals sch'el vegn ina giada sin visita. K. ma pareva adina in um cuntent. E grazia a ses interess per l'art avev'jau l'impressiun ch'el saja pli u main adina fatschentà cun insatge e ch'el haja en ses conturn ina buna rait sociala.

Avant insaquants dis m'ha el ditg al telefon: «L'onn 2014 è stà in grev onn per mai. Jau vom ussa vers ils 80 ed il davos temp m'èsi adina puspè vegnì endament tge ch'jau hai tut fatg fallà en mia vita. Jau avess stuì far en blers regards dapli, jau n'hai vairamain prestà nagut ed jau hai tralascià fitg savens da prender cleramain posiziun.»

En da questas situaziuns sun jau per ordinari svelt pronta cun cussegls. Ma bain savend che «Ratschläge» èn «Schläge» sco quai ch'il Tudestg di, hai jau questa giada taschiè



simplamain tadlà vinavant. K. era en ina fasa da lamentaschuns ed jau hai gì il sentiment ch'i saja impurtant da laschar el in'urella en questa fasa. Silsunter hai jau ditg ad el che mingin da nus haja pli probabel tals patratgs ina giada u l'otra. El duaja, enstagl da sulettamain laschar vegnir endament tge che n'è betg reussì en sia vita, era ponderar tge che saja tut gartegià bain en sia vita, era grazia a sia lavur e ses engaschi.

Pensiva sun jau stada suenter il telefon en emprima lingia pervia da la direzza da K. envers sasez. En princip n'èsi betg lev da guardar sin sasez e reflectar sur da sasez or d'ina optica objectiva. Nus essan gea il subject principal en nossa vita. E chattar adina danovamain l'equiliber tar nus sezs e tegnair quint da las differentas realitads n'è betg

simpel. En il contact cun nus sezs vai in pau sco cun il perpendicul da l'ura. Quel na stat mai airi entamez. El va vi e nà, dad in extrem tar l'auter. Ina giada avain nus l'impressiun che nus sajan sappia Dieus tge, e l'otra giada avain nus l'impressiun che nus na valian nagut, na fetschian nagut e na sappian nagut.

Ma da quai n'hai jau ditg gnanca pled a K. Forsa avess jau stuì raquintar ad el dad ina buna enconuschenta da mai ch'è morta da cancer avant in temp. Ina persuna che l'aveva accompagnada en sia davosa fasa da la vita aveva recumandà ad ella quatter chaussas: Crai a tai tezza, fida a tai tezza, ama tai tezza e perduna a tai tezza!

Cunzunt perdunar a sasez è dal diavel grev. Perquai, sche vus n'avais enfin ussa betg fatg tut a moda perfetga, as giavisch jau per l'entschatta da l'onn nov che vus avajas la buna voluntad da perdunar a vus sezs. Forsa nascha l'uman perfetg l'onn 2015. Ma enfin ussa n'ha nagin ch'era en tut ils regards perfetg mess ses pes sin nossa terra. Pia èsi uras da far pasch era cun las persunas imperfetgas ed uschia il pli emprim cun sasez.

maria.cadruvi@spin.ch